

Powšitkowne WOZJEWJENJA

njedźelu, 28. junija 2020

Na Marije wopytanja w Róžeńće

Boža mša na swjedženju Marije wopytanje štwórtk, 2. julija, w Róžeńće budže dopołdnja w 9 hodž. Dokelž putnikowanje lětsa korony dla wupadnje, budu we wšitkich wosadach na tutym dnju wječorne kemše.

Změna kemšacych časow w Róžeńće

Wot njedźele, 5. julija, hač do kónca septembra płaci w Róžeńće zaso lětni porjad Božich službow. Njedźelu je tam Boža mša jeničce w 10.30 hodž. w serbskej rěči.

Serbske kemše w Drježdžanach

Drježdžanscy Serbja su na maćernorěčnu Božu mšu tutu njedźelu, 28. junija, w 16 hodž. do cyrkwy swjateho Antonija w Drježdžanach-Löbtauwje, Bünauska hasa 10, přeprošeni. Kemše změje farar Gabriš Nawka. Zetkanje w tamnišej wosadnicy zakonskich postajenjow koronoweje pandemije dla njebudže.

Dźěłowe městno pola Katolskeho Posoła

Towarstwo Cyrila a Metoda z.t. pyta wot 1. decembra wosobu, kotraž by redakciski team zesylniła. Dotalna sobudźělačerka poda so kónc nowembra na wuměnk. Wuměnjenska přistajenja su nimo wuznaća k wěrje a wučbje romsko-katolskeje cyrkwy wotzamknjene powołanske wukubłanje, jara dobre znajomosće serbskeje rěče, stawiznow a kultury, po móžnosći znajomosće rěče, stawiznow a kultury druhich słowjanskich krajow, znajomosće na polu žurnalizma, sadžby (Adobe InDesign), we wobdźělanju wobrazow (Adobe Photoshop) kaž tež zakładne znajomosće na polu katolskeje nabožiny respektiwnje zwólniwość, sej to w krótkim času přiswojić. Wukonjeć maja so tohorunja z pomocu kompjuterowych programow zarjadniske nadawki. Mzda płaci so po tarifowym zrěčenju za zjawnostnu službu (TVöD). Zajimcy měli so hač do wutory, 30. junija, pola Towarstwa Cyrila a Metoda z.t., Póstowe naměsto 2, 02625 Budyšin, abo na mailowu adresu TCM@Posol.de pisomnje wo městno požadać. Tam zhonja nadrobnosće.

Kapałnicy předstajeja so we wideju

Swój dzeń wotewrjenych duri korony dla su Drježdžanscy kapałnicy lětsa na hinaše wašnje přewjedli hač zašle lěta. Poprawom móža wopytwarjo na příklad próby scěhować, so po instituce kapałnikow rozhladować kaž tež internatny wšědny dzeń zeznać. Tónraz móža zajimcy kapałnikow we widejomaj zeznać. W jednym rozložuje kapałnik Nicola hudźbne wukubłanje, w druhim wodža Henry, Hermann a Joe-Elias po internaće. Hólcy přichodneho 1. do 4. lětnika, kotřiž bychu rady pola kapałnikow sobu skutkowali, su ze swojimi staršimi wutrobnje na předspěwanje witani. Link k widejomaj a nadrobnym informacijam su na internetowej stronje www.posol.de podate.

Putnikowanje z biskopom do Kevelaera

Pod hesłom „Sym tam, hdžež sy ty!“ přeprašuje Drježdžansko-Mišnjanske biskopstwo zajimowanych wěriwych na putnikowanje do Münsterskeho biskopstwa. Duchowny nawod změje wottam pochadźacy biskop Heinrich Timmerevers. Cil busoweje jězby wot štwórtka hač do njedźele, 27. do 30. awgusta, je marijanske putniske městno Kevelaer. Planowany je tohorunja wopyt biskopskeho města Münstera. W tutej diecezy je biskop Timmerevers 15 lět jako swjećacy biskop skutkował. Zajimcy njech přizjewja so pola ATeams-Reiseservice w Budyšinje na Seminarskej 2, telefonowe čisło (0 35 91) 53 18 53 abo z mailku pod bautzen@ateams.de. Tež dalše nadrobnosće tam zhonja.

Tachantska pokładownja zaso wotewrjena

Wopyt Budyskeje tachantskeje pokładownje je zaso móžny. Hladajo na postajenja koronowe-je pandemije pak je ličba runočasnje w rumnosćach přitomnych wosobow na pjeć wobmjezowana. Wuwzaće tworja swójby z wjace hač tři dźěćimi. Wodženja tuchwilu móžne njejsu, nošenje škita nosa a erta so doporuča. Pokładownja je wot póndźele do pjatka wot 10 do 12 hodź. a wot 13 do 16 hodź. kaž tež přenju sobotu měsaca wot 10 do 15 hodź. wotewrjena.